

**Nunatsinni Angajoqqaat Oqartussaaffiisa annertunerulernissaat ersarinnerulernissaallu anguniarlugu ”Angajoqqaat Peqatigiiffiannik” taaneqartumik Atuarfitsialammi inatsisip § 40-41-42-p Atuarfiup siulersuisuinut inatsimmut ilanngussinissaq pillugu apeqquteqaat aallaavigalugu oqallisigineqarnissaannik siunnersuut.**

(Inatsisartunut ilaasorta, Ruth Heilmann Siumut)

**Akissuteqaat**

(Ilinniartitaanermut, Ilisimatusarnermut Nunanullu Avannarlernut Suleqateqarnermut Naalakkersuisoq)

Inatsisartunut ilaasorta Ruth Heilmann, Siumut apeqquteqaat aallaavigalugu oqallinnermi siunnersuuteqarpoq meeqqat atuarfiat pillugu peqqussummi ”Angajoqqaat Peqatigiiffiannik” taaneqartumik aalajangersakkani ilanngussisoqassasoq.

Naalakkersuisut isumaqarput inatsisiliorneq atorlugu innuttaasut pingitsaalineqarsinnaanngitsut peqatigiiffimmik aalajangersimasumik anguniagalimmik siunertalimmilluunniit pilersitseqqullugit.

Peqatigiiffeqarnikkut kiffaanngissuseq Europami inuit pisinnaatitaaffii pillugit ataatsimiititaliarsuaq (Den Europæiske Menneskerettighedskommission ) naapertorlugu anguniakkat assigiinngitsut anguniarlugit peqatigiiffeqarneq **naalagaaffimmit akuleruffigineqanngitsumik** innuttaasut tamat katerissinnaanermut periarfissaattut paasineqassaaq. Peqatigiiffiup qanoq paasineqarsinnaaneranut nassuiaat aammavoq [www.menneskeret.dk](http://www.menneskeret.dk) -li malillugu peqatigiiffik tassunga atatillugu tassaavoq “qanorluunniit ikkalarpat nammineq kajumissutsimik tunngaveqartumik inuit arlaliullutik ataatsimoorussaminnik peqatigiiffiliutissaqartut kateriffigisaat, ataatsimoorussamik siunertaqartoq.”

Taamatut oqareerlunga **nammineq kajumissuseq tunngavigalugu** angajoqqaanut meeqqat atuarfianni meeqqamik atuarnerannut atugarissaarnerannullu soqutigisaqartunut peqatigiiffiliornissamik kattuffiliornissamilluunniit isuma taperserlugu oqaatigerusuppara. Siunnersuuteqartoq isumaqatigaara tulluurtuussasoq meeqqat atuarfiat pillugu apeqqutini pingaarutilinni soorlu siunissami isummersortarnissani, inerisaanissani imaluunniit inatsisiliorniarnerni angajoqqaat soqutigisaannik aallussisinnaasumik suliniaqatigiiffiliortoqartariaqaraluartoq.

Kissaat taanna siusinnerusukkut nuna tamakkerlugu atuarfinni siulersuisunut ilaasortanut pikkorissarnerni saqqummiunneqartareersimavoq piviusunnigortinneqartarsimananili angajoqqaanik namminneq kajumissutsiminnik tunngavilimmik sulerusuttunik suliassamik aallartitserusuttoqartarsimanngimmat. Naalakkersuisut taamaamat angajoqqaat peqatigiiffissaannik kajumissuseq naapertorlugu suliniuteqarusuttut tamarluinnaasa tikilluaqqumavaat tapersersorusullugillu meeqqatta atuarnerat atugarissaarnerallu pillugu siunissami oqallinnernut pitsanngorsaaqataasinnaassammat.

Taamatut oqaaseqarlunga Inatsisartut oqallilluarnissaannik kissaappakka.